



Bosnia and Herzegovina  
Federation of Bosnia and Herzegovina

**CANTON SARAJEVO**  
**Government**

Broj: 02-04-5574-2/22  
Sarajevo, 24.02.2022. godine

Na osnovu člana 26. i 28. stav (4) Zakona o Vladi Kantona Sarajevo ("Službene novine Kantona Sarajevo", broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na **66.** sjednici održanoj **24.02.2022.** godine, donijela je

## **ZAKLJUČAK**

1. Utvrđuje se nacrt Zakona o prevenciji i suzbijanju korupcije u Kantonu Sarajevo.
2. Predlaže se Skupštini Kantona Sarajevo da utvrdi zakon iz tačke 1. ovog zaključka i u skladu sa Poslovníkom Skupštine Kantona Sarajevo („Službene novine Kantona Sarajevo“, broj: 41/12 - Drugi novi prečišćeni tekst, i 15/13, 47/13, 47/15, 48/16, 9/20 i 14/20), uputi u javnu raspravu u trajanju od 45 dana.

**PO OVLAŠTENJU PREMIJERA**

**ministar Davor Čičić**

Dostaviti:

1. Predsjedavajući Skupštine Kantona Sarajevo,
2. Skupština Kantona Sarajevo,
3. Zamjenici predsjedavajućeg Skupštine Kantona Sarajevo (3x),
4. Premijer Kantona Sarajevo,
5. Ministarstvo pravde i uprave Kantona Sarajevo,
6. Evidencija,
7. A r h i v a.

BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
VLADA

**ZAKON**  
**O PREVENCIJI I SUZBIJANJU KORUPCIJE U KANTONU**  
**SARAJEVO**  
**(nacrt)**

Nosilac izrade:  
Ministarstvo pravde i uprave Kantona Sarajevo

februar 2022. godine

Na osnovu člana 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana       2022. godine, donijela je

(NACRT)

## **ZAKON O PREVENCIJI I SUZBIJANJU KORUPCIJE U KANTONU SARAJEVO**

### **DIO PRVI - OSNOVNE ODREDBE**

#### **Član 1.**

##### **(Predmet)**

- (1) Ovim zakonom propisuju se obaveze nosioca javnih funkcija u Kantonu Sarajevo (u daljem tekstu: nosilac javne funkcije) u vršenju javnih funkcija, pravila o prevenciji, utvrđivanju i odlučivanju o sukobu interesa u vršenju javnih funkcija, zaštita lica koja prijavljuju korupciju, jačanje integriteta institucija i njihovih zaposlenika, ograničenja i odgovornosti u vršenju javnih funkcija, kao i druga pitanja od značaja za prevenciju, suzbijanje i borbu protiv korupcije u Kantonu Sarajevo.
- (2) Pored obaveza iz stava (1) ovog člana, ovim zakonom osigurava se zabrana vršenja nespojivih javnih funkcija, prevencija sukoba interesa i koruptivnog djelovanja u vršenju javne funkcije, zaštita integriteta javne funkcije, definisanje mjera za unapređenje integriteta, zaštita lica koja u dobroj vjeri prijavljuju korupciju u institucijama i jačanje organa koji imaju nadležnosti u oblasti prevencije, suzbijanja i borbe protiv korupcije u Kantonu Sarajevo i osiguranja efektivne, kvalitetne i pravovremene zaštite prijavitelja korupcije.
- (3) Ovim zakonom se propisuje obaveza odgovornog ponašanja u vršenju javnih funkcija i drugih odgovornih dužnosti u Kantonu Sarajevo.
- (4) Osnovna svrha donošenja ovog zakona je sistemska prevencija, suzbijanje i borba protiv korupcije u Kantonu Sarajevo.

#### **Član 2.**

##### **(Definicije)**

Pojedini pojmovi koji se koriste u ovom zakonu imaju sljedeća značenja:

- a) **“korupcija”** podrazumijeva svaku zloupotrebu i prekoračenje službenih ovlasti povjerenih nosiocu javne funkcije ili licu na drugom političkom ili odgovornom položaju na nivou Kantona Sarajevo, nivou Grada Sarajevo ili nivou općina na teritoriji Kantona Sarajevo, radi sticanja privatne koristi. Korupcija posebno podrazumijeva traženje, nuđenje, davanje ili primanje, neposredno ili posredno, mita ili druge nedozvoljene koristi ili mogućnost sticanja takve koristi, za sebe ili drugoga, koja remeti pravilno obavljanje bilo koje dužnosti ili ponašanje koje se traži od lica koje prima mito, nedozvoljenu korist ili mogućnosti sticanja takve koristi. Korupcijom se smatra i svaka zloupotreba i prekoračenje službenih ovlasti, iskorištavanje ili zloupotreba službenog položaja koju izvrši odgovorno lice ili lice zaposleno u instituciji ili u privrednom društvu, a radi sticanja privatne koristi;
- b) **“sukob interesa”** postoji u situacijama u kojima nosilac javne funkcije ima privatni interes koji utiče, može uticati ili izgleda kao da utiče na zakonitost, otvorenost, objektivnost i nepristrasnost u vršenju javne funkcije;
- c) **“nosiocima javnih funkcija”** smatraju se: poslanici/zastupnici u Skupštini Kantona

Sarajevo (u daljem tekstu: Skupština), vijećnici u Gradskom vijeću Grada Sarajevo i vijećnici u općinskim vijećima općina na teritoriji Kantona Sarajevo, premijer Kantona Sarajevo i članovi Vlade Kantona Sarajevo (u daljem tekstu: Vlada), gradonačelnik Grada Sarajevo i općinski načelnici općina na teritoriji Kantona Sarajevo, rektor Univerziteta u Sarajevu i rukovodioci organizacionih jedinica Univerziteta u Sarajevu, direktori, izvršni direktori, pomoćnici direktora, agencija, fondova, javnih preduzeća i javnih ustanova i institucija koji se imenuju ili postavljaju na mandatni period i zamjenici direktora agencija, fondova, zavoda, javnih preduzeća, javnih ustanova, samostalnih kantonalnih uprava i samostalnih kantonalnih upravnih organizacija i drugih institucija čiji je osnivač Kanton Sarajevo, Grad Sarajevo ili općina na teritoriji Kantona Sarajevo ili u kojima Kanton Sarajevo, Grad Sarajevo ili općina na teritoriji Kantona Sarajevo učestvuju sa više od 50% ukupnog kapitala, kao i druga lica koja su izabrana ili imenovana ili je za njihov izbor ili imenovanje data saglasnost od strane Skupštine, Gradskog vijeća Grada Sarajevo, općinskog vijeća, Vlade, Gradonačelnika ili načelnika. Nosiocima javnih funkcija smatraju se i vršioci dužnosti prethodno pobrojanih javnih funkcija, savjetnici naprijed pobrojanih nosioca javnih funkcija u Kantonu Sarajevo koji se imenuju po *lex specialis* propisima i vršioci dužnosti pobrojanih nosioca javnih funkcija;

d) **“institucija”** je svaki organ državne službe, javno preduzeće, javna ustanova, agencija, fond, zavod i drugi pravni subjekt koji vrši javna ovlaštenja i čiji osnivač je Kanton Sarajevo, Grad Sarajevo ili općina na teritoriji Kantona Sarajevo ili u kome Kanton Sarajevo, Grad Sarajevo ili općina na teritoriji Kantona Sarajevo učestvuju sa više od 50% ukupnog kapitala i ima svojstvo pravnog lica;

e) **“javna funkcija”** podrazumijeva poslove nosioca javne funkcije, koji proizilaze iz funkcije koju vrši;

f) **“odgovornim licem”** smatra se lice koje je osnivačkim aktom, pravilima, statutom ili drugim aktom institucije iz tačke d) ovog člana odgovorno da rukovodi, predstavlja i zastupa instituciju i odgovara za zakonitost rada institucije. Pod odgovornim licem smatra se i lice odgovorno da rukovodi poslovanjem, predstavlja i zastupa privredno društvo koje samostalno na tržištu obavlja djelatnosti radi sticanja dobiti i odgovara za zakonitost poslovanja privrednog društva;

g) **“javni interes”** je materijalni i nematerijalni interes koji služi za dobro, prosperitet, sigurnost i blagostanje svih građana, pod jednakim uslovima;

h) **“privatni interes”** je bilo kakva korist ili pogodnost za nosioca javne funkcije ili njegovog srodnika;

i) **“korist”** podrazumijeva imovinu ili imovinska i druga materijalna i nematerijalna prava;

j) **“finansijski interes”** je svaki interes kojim se nosiocu javne funkcije omogućava da primi novac u vrijednosti većoj od 1.000,00 KM godišnje, kao i svaki vlasnički interes koji ima nosilac javne funkcije koji odgovara vrijednosti od najmanje 10.000,00 KM u nekom privrednom društvu;

k) **“srodnici”** su bliski srodnici, srodnici u pravoj liniji, srodnici u pobočnoj liniji do trećeg stepena, srodnici po tazbini do drugog stepena i dijete bračnog druga;

l) **“bliskim srodnicima”** se smatraju bračni i vanbračni drug, dijete, majka, otac, usvojenik i usvojenik nosioca javne funkcije;

m) **“povezano lice”** podrazumijeva srodnika ili lice koje je sa nosiocem javne funkcije u ličnoj, političkoj, ekonomskoj ili drugoj vezi koja bi mogla uticati na objektivnost u radu nosioca javne funkcije, kao i fizičko ili pravno lice koje se prema drugim osnovama i okolnostima može opravdano smatrati interesno povezanim sa nosiocem javne funkcije;

n) **“javno preduzeće”** jeste preduzeće (pravno lice upisano u sudski registar kao privredno društvo, odnosno javno preduzeće definirano kao takvo posebnim propisom) koje obavlja djelatnost od javnog društvenog interesa i čiji osnivač je Kanton Sarajevo, Grad Sarajevo ili

općina na teritoriji Kantona Sarajevo ili u kome Kanton Sarajevo, Grad Sarajevo ili općina na teritoriji Kantona Sarajevo učestvuju sa više od 50% ukupnog kapitala i ima svojstvo pravnog lica;

o) **“privredno društvo”** je pravno lice definisano zakonom kojim se uređuje osnivanje, poslovanje, upravljanje i prestanak privrednih društava, koje samostalno obavlja djelatnost proizvodnje i prodaje proizvoda i pružanja usluga na tržištu radi sticanja dobiti, koje mogu osnovati i domaća i strana fizička i pravna lica bez obzira na oblik organizovanja, ako posebnim zakonom nije drugačije određeno;

p) **“ulaganje kapitala”** je ulaganje novca, stvari i prava u vlasničku strukturu privrednog društva;

r) **“lična usluga”** podrazumijeva svako djelovanje kojim se nosilac javne funkcije obavezuje, uz naknadu, obaviti određeni posao za instituciju iz tačke d) ovog člana ili privredno društvo koje sklapa ugovore ili na drugi način posluje sa institucijom u kojoj nosilac javne funkcije vrši javnu funkciju, a koja ne proizilazi iz javne funkcije;

s) **“prijavitelj korupcije”** je fizičko lice koje u dobroj vjeri prijavi korupciju u instituciji iz tačke d) ovog člana;

t) **“ovlašteno lice”** je lice ovlašteno od strane odgovornog lica za postupanje po prijavama korupcije;

u) **“štetna radnja”** je ugrožavanje ili povreda prava prijavitelja korupcije, a koja je u uzročno - posljedičnoj vezi sa prijavom korupcije ili bilo kakvo stavljanje prijavitelja korupcije u nepovoljniji položaj zbog prijave korupcije. Štetna radnja posebno podrazumijeva svako isključivanje ili ograničavanje prijaviteljeve mogućnosti učestvovanja u konkursima za zapošljavanje ili unapređenje, prestanak radnog odnosa, premještaj, isključivanje ili ograničavanje mogućnosti stručnog obrazovanja i usavršavanja, lošiju ocjenu rada, lošije uslove i zahtjeve rada, suspenziju sa poslova i plaće, vraćanje na nižu kategoriju u okviru radnih mjesta, izostanak poslovnog angažmana, stvaranje radnih uslova kojima bi se prijavitelj i ostali zaposlenici odvratili od zaštićenog prijavljivanja, uznemiravanje, mobing, kao i svaka druga okolnost koja ima za svrhu ili posljedicu da se prijavitelju onemogući ili ugrožava priznavanje, uživanje ili ostvarivanje, na ravnopravnom osnovu prava i sloboda u svim oblastima javnog života, a koja se može dovesti u neposrednu ili posrednu vezu sa prijavljivanjem korupcije;

v) **“integritet institucije”** je skup vrijednosti i postupanja institucija iz tačke d) ovog člana kojima se stvaraju, održavaju i unaprjeđuju uslovi da nosioci javnih funkcija, zaposleni i radno angažovani u institucijama poštuju zakone i druge propise, interne akte institucije, kodekse ponašanja i etički djeluju sa ciljem izbjegavanja korupcije i poboljšanja rada;

z) **“koruptivni rizik u propisu”** predstavlja podložnost pojedinih odredbi nacrta, prijedloga ili već donijetog zakona ili drugog propisa korupciji, sukobu interesa ili drugim oblicima postupanja koji imaju obilježja pristrasnosti;

aa) **„prijava korupcije u dobroj vjeri“** predstavlja opravdan razlog za vjerovanje da je informacija bila istinita u trenutku kad je podnesena prijava.

### Član 3.

#### (Gramatička terminologija)

Gramatička terminologija korištenja muškog ili ženskog spola podrazumijeva uključivanje oba spola.

## **DIO DRUGI - SUKOB INTERESA**

### **POGLAVLJE I – NESPOJIVOSTI, OGRANIČENJA I ZABRANJENE AKTIVNOSTI U VRŠENJU JAVNIH FUNKCIJA**

#### **Član 4.**

##### **(Principi djelovanja u vršenju javne funkcije)**

- (1) Nosilac javne funkcije dužan je da u vršenju javne funkcije ne podredi javni interes privatnom, da se pridržava propisa koji uređuju njegova prava i obaveze i da ne izazove sukob interesa u vršenju javne funkcije, u cilju njegovog sprječavanja.
- (2) Nosilac javne funkcije dužan je javnu funkciju vršiti zakonito, transparentno, objektivno i nepristrasno.
- (3) Nosilac javne funkcije ne smije biti zavisn od lica koja bi mogla da utiču na njegovu nepristrasnost, niti da koristi javnu funkciju zarad sticanja bilo kakve koristi za sebe ili povezano lice.
- (4) Nosiocu javne funkcije zabranjeno je upotrebljavati informacije do kojih dođe u vršenju javne funkcije radi sticanja koristi za sebe ili drugog ili nanošenja štete drugom, a koje nisu dostupne javnosti.

#### **Član 5.**

##### **(Nespojivosti sa vršenjem javne funkcije)**

- (1) Nosilac javne funkcije ne može, za vrijeme vršenja javne funkcije i tri mjeseca nakon prestanka vršenja javne funkcije, vršiti sljedeće funkcije:
  - a) predsjednika ili člana skupštine javnog preduzeća, punomoćnika Vlade za vršenje ovlaštenja skupštine u javnom preduzeću, predsjednika ili člana nadzornog odbora javnog preduzeća, člana uprave javnog preduzeća, predsjednika ili člana odbora za reviziju javnog preduzeća ili vršiti poslove odgovornog lica u javnom preduzeću;
  - b) predsjednika ili člana nadzornog ili upravnog odbora agencija, fondova, zavoda, javnih ustanova čiji je osnivač Kanton Sarajevo, Grad Sarajevo ili općina na teritoriji Kantona Sarajevo ili u kojima Kanton Sarajevo, Grad Sarajevo ili općina na teritoriji Kantona Sarajevo učestvuju sa više od 50% ukupnog kapitala;
  - c) predsjednika ili člana školskog odbora osnovnih i srednjih škola kao javnih ustanova na području Kantona Sarajevo;
  - d) direktora, pomoćnika ili zamjenika direktora agencija, fondova, zavoda, javnih ustanova čiji je osnivač Kanton Sarajevo, Grad Sarajevo ili općina na teritoriji Kantona Sarajevo ili u kojima Kanton Sarajevo, Grad Sarajevo ili općina na teritoriji Kantona Sarajevo učestvuju sa više od 50% ukupnog kapitala.
- (2) Nosilac javne funkcije ne može, za vrijeme vršenja javne funkcije i tri mjeseca nakon prestanka vršenja javne funkcije, biti vršilac dužnosti funkcija iz stava (1) ovog člana.
- (3) Nosilac javne funkcije istovremeno može obavljati samo jednu javnu funkciju, osim ako posebnim propisom nije drugačije određeno.
- (4) Lica koja nisu nosioci javnih funkcija mogu istovremeno obavljati najviše dvije funkcije iz stava (1) ovog člana, osim ako posebnim propisom nije drugačije određeno.
- (5) Nosilac javne funkcije dužan je podnijeti ostavku na nespojivu funkciju iz st. (1) i (2) ovog člana ili na drugi način odstupiti sa nespojive funkcije, u roku od 30 dana nakon preuzimanja zadnje nespojive funkcije.

#### **Član 6.**

##### **(Nespojivosti u odnosu na privredna društva)**

- (1) Nosilac javne funkcije, za vrijeme vršenja javne funkcije, ne može biti predsjednik ili član

skupštine privrednog društva, predsjednik ili član nadzornog odbora, uprave (menadžmenta), niti biti u svojstvu odgovornog lica privrednog društva u koje je institucija u kojoj vrši javnu funkciju, za vrijeme njegovog vršenja javne funkcije, ulagala kapital ili s kojim je sklapala ugovore, bez obzira na vrijednost ugovora.

- (2) Nosilac javne funkcije, za vrijeme vršenja javne funkcije, ne može biti predsjednik ili član skupštine privrednog društva, predsjednik ili član nadzornog odbora, uprave (menadžmenta), niti biti u svojstvu odgovornog lica privrednog društva koje sklapa ugovore u vrijednosti većoj od 10.000,00 KM godišnje, sa institucijama iz člana 2. stav (1) tačke d) ovog zakona.
- (3) Nosilac javne funkcije dužan je podnijeti ostavku na jednu od nespojivih funkciju ili na drugi način odstupiti sa nespojive funkcije, u roku od 30 dana nakon preuzimanja zadnje nespojive funkcije.

#### **Član 7.**

##### **(Nespojivosti u odnosu na fondacije i udruženja)**

- (1) Nosilac javne funkcije, za vrijeme vršenja javne funkcije, ne može vršiti dužnost odgovornog lica u udruženjima i fondacijama, osnovanim u skladu sa zakonima o udruženjima i fondacijama, a koje se finansiraju iz budžeta Kantona Sarajevo u iznosu većem od 10.000,00 KM godišnje, odnosno u iznosu većem od 50.000,00 KM godišnje u udruženjima i fondacijama iz oblasti kulture i sporta.
- (2) Nosilac javne funkcije dužan je podnijeti ostavku na jednu od nespojivih funkciju ili na drugi način odstupiti sa nespojive funkcije, u roku od 30 dana nakon preuzimanja zadnje nespojive funkcije.

#### **Član 8.**

##### **(Ugovori o ličnim uslugama)**

- (1) Nosilac javne funkcije ne može, za vrijeme vršenja javne funkcije i tri mjeseca nakon prestanka vršenja javne funkcije sklapati ugovore o pružanju ličnih usluga sa institucijama.
- (2) Nosilac javne funkcije, za vrijeme vršenja javne funkcije, ne može sklapati ugovore o pružanju ličnih usluga sa bilo kojim privrednim društvom koje sklapa ugovore ili na drugi način posluje sa institucijama, ako je vrijednost tog pravnog posla veća od 10.000,00 KM na godišnjem nivou.
- (3) U slučaju da nosilac javne funkcije prekrši odredbe iz st. (1) i (2) ovog člana, ugovor o pružanju ličnih usluga nosioca javne funkcije smatrat će se ništavnim.

#### **Član 9.**

##### **(Izuzete u vršenju javne funkcije)**

- (1) Nosilac javne funkcije ne može glasati po bilo kojem pitanju koje se direktno tiče privrednog društva u kojem nosilac javne funkcije ili njegov bliski srodnik imaju finansijski interes.
- (2) Nosilac javne funkcije koji se nađe u situaciji iz stava (1) ovog član uzdržat će se od glasanja i neće preduzimati nikakve službene radnje koje bi mogle direktno uticati na privredno društvo u kojem taj nosilac javne funkcije ili njegov bliski srodnik imaju finansijski interes.
- (3) Nosilac javne funkcije, u situaciji iz stava (1) ovog člana, će davanjem izjave o postojanju finansijskog interesa njega ili njegovog bliskog srodnika obavijestiti ostale učesnike u raspravi i odlučivanju, prije svog učešća u raspravi, a najkasnije prije početka odlučivanja.
- (4) Institucija u kojoj nosilac javne funkcije vrši javnu funkciju dužna je da izjavu iz stava (3) ovog člana unese u zapisnik.

#### **Član 10.**

### **(Zabranjene aktivnosti)**

Nosiocu javne funkcije zabranjuje se:

- a) primiti novac, ček, hartije od vrijednosti, druge vrijednosne papire ili dragocjeni metal;
- b) primiti dodatnu naknadu za poslove vršenja javne funkcije protivno odredbama pozitivnih zakonskih propisa o plaćama i naknadama zaposlenih u organima vlasti Kantona Sarajevo i drugih propisa;
- c) tražiti, prihvatiti ili primiti vrijednost ili uslugu radi glasanja o bilo kojem pitanju ili uticati na odluku nekog organa ili lica;
- d) obećavati zaposlenje ili neko drugo pravo u zamjenu za poklon ili obećanje poklona;
- e) privilegovati lica radi stranačkog ili drugog opredjeljenja ili radi porijekla, ličnih ili porodičnih veza;
- f) uticati na dobivanje poslova ili narudžbi Kantona Sarajevo u cilju sticanja materijalne ili nematerijalne koristi za sebe ili za drugog;
- g) koristiti povlaštene informacije o radu institucije radi lične koristi ili koristi povezanih lica;
- h) na drugi način koristiti svoj položaj kako bi uticao na zakonodavne, izvršne ili sudske vlasti, te tako postigao ličnu korist ili korist povezanih lica, neku povlasticu ili pravo, sklopio pravni posao ili na drugi način interesno pogodio sebi ili drugom povezanom licu.

## **POGLAVLJE II – ODLUČIVANJE O SUKOBU INTERESA**

### **Član 11.**

#### **(Organ za pokretanje postupka i odlučivanje)**

- (1) Komisija za utvrđivanje sukoba interesa (u daljem tekstu: Komisija) je organ nadležan za pokretanje postupka za utvrđivanje postojanja sukoba interesa iz čl. 5., 6., 7., 8. i 9. ovog zakona, donošenje odluke o postojanju sukoba interesa i izricanje sankcije nosiocu javne funkcije koji je u utvrđenom sukobu interesa.
- (2) Komisija pokreće postupak za utvrđivanje postojanja sukoba interesa po službenoj dužnosti, na osnovu zahtjeva institucije u kojoj nosilac javne funkcije vrši javnu funkciju, zahtjeva fizičkog ili pravnog lica i na lični zahtjev nosioca javne funkcije.

### **Član 12.**

#### **(Komisija za utvrđivanje sukoba interesa)**

- (1) Na prijedlog Komisije za izbor i imenovanja Skupštine Kantona Sarajevo (u daljem tekstu: Komisija za izbor i imenovanja), Skupština imenuje Komisiju.
- (2) Komisija je nezavisno tijelo Skupštine koje provodi postupak utvrđivanja sukoba interesa.
- (3) Komisija radi isključivo na profesionalnim osnovama, ne zastupajući, ne štiteći niti podrivajući interese bilo koje političke stranke, registrovane organizacije ili udruženja ili bilo kojeg naroda u Bosni i Hercegovini.
- (4) Komisiju čine predsjednik i četiri člana.
- (5) Šef Ureda za borbu protiv korupcije i upravljanje kvalitetom je predsjednik Komisije, koji organizuje i upravlja radom Komisije.
- (6) U slučaju da je spriječen ili odsutan, predsjednik Komisije imenuje svoga zamjenika iz reda članova Komisije.
- (7) Predsjednik Komisije saziva i predsjedava sjednicama Komisije, potpisuje akte donesene na sjednicama Komisije i brine o pravilnom i efikasnom provođenju odredbi ovog zakona.



- (8) Četiri člana Komisije se biraju iz reda istaknutih stručnjaka iz oblasti borbe protiv korupcije, prava, ekonomije, kriminalistike te organizacija koje se bave zaštitom ljudskih prava ili drugih srodnih oblasti, a koji nisu zaposleni u organima javnog sektora Kantona Sarajevo.
- (9) Komisija donosi odluke na sjednicama, većinom glasova svih članova Komisije.
- (10) Za kvorum je neophodno prisustvo najmanje tri člana Komisije.
- (11) Odluke Komisije su javne i objavljuju se na web stranici Skupštine.
- (12) Član Komisije koji se ne slaže sa većinom u donošenju odluka može dati izdvojeno mišljenje koje se objavljuje na web stranici Skupštine.
- (13) Komisija u svom radu primjenjuje odredbe Zakona o upravnom postupku ("Službene novine Federacije Bosne i Hercegovine", br. 2/98 i 48/99).
- (14) Komisija u svom postupanju ima pravo vršiti sve radnje propisane u ovom zakonu, za koje smatra da su neophodne pri utvrđivanju sukoba interesa.
- (15) Komisija putem Ureda za borbu protiv korupcije i upravljanje kvalitetom Kantona Sarajevo (u daljem tekstu: Ured) izriče novčane kazne za prekršaje propisane ovim zakonom.
- (16) Administrativno-tehničke poslove u vezi rada Komisije obavlja Ured.
- (17) Članovi Komisije za svoj rad imaju pravo na mjesečnu naknadu čiji visinu utvrđuje nadležna komisija Skupštine Kantona Sarajevo.

### **Član 13.**

#### **(Uslovi za imenovanje članova Komisije i rad Komisije)**

Član Komisije može biti svako lice koje:

- a) je državljanin Bosne i Hercegovine,
- b) ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova ili drugog ili trećeg ciklusa Bolonjskog sistema studiranja iz oblasti umjetnosti, pravnih, društvenih i humanističkih nauka, najmanje osam godina radnog staža u struci u ovim oblastima nakon sticanja visoke školske spreme, uz najmanje dva objavljena naučna rada u referentnim časopisima,
- c) nije član političke stranke,
- d) nije bilo imenovano na bilo kojoj poziciji u političkoj stranci, niti je bilo postavljeno na bilo koju poziciju od strane političke stranke,
- e) nije bilo član izvršnog ili zakonodavnog tijela na bilo kojem nivou vlasti u Bosni i Hercegovini.

### **Član 14.**

#### **(Imenovanje Komisije i trajanje mandata)**

- (1) Komisija se imenuje na mandatni period od pet godina, bez prava reizbora.
- (2) Postupak izbora novog saziva Komisije pokreće se najkasnije šest mjeseci prije isteka mandata imenovane Komisije.
- (3) Ukoliko mandat Komisije istekne prije imenovanja nove Komisije, postojeća Komisija nastavlja u kontinuitetu vršiti svoje dužnosti sve do imenovanja nove Komisije.
- (4) Odredbe Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije Bosne i Hercegovine", br. 12/03, 34/03 i 65/13), se primjenjuju na izbor članova Komisije, ukoliko nije drugačije određeno ovim zakonom.

## **Član 15.**

### **(Ostavka i razrješenje člana Komisije)**

- (1) Član Komisije može podnijeti ostavku.
- (2) Ostavka se podnosi Skupštini.
- (3) Ostavka jednog ili više članova Komisije ne smije utjecati na rad Komisije.
- (4) Član Komisije u ostavci nastavlja da obavlja svoje dužnosti, uključujući i donošenje odluka, sve dok Skupština ne izvrši imenovanje novog člana ili članova.
- (5) Komisija za izbor i imenovanja je dužna odmah započeti postupak izbora novog člana.
- (6) Član Komisije razrješit će se sa dužnosti:
  - a) u slučaju gubitka poslovne sposobnosti;
  - b) ako prestanu postojati uslovi za njegovo imenovanje iz člana 14. ovog zakona;
  - c) ako prekrši odredbe ovog zakona.
- (7) Odluku o razrješenju člana Komisije, na prijedlog Komisije za izbor i imenovanja, donosi Skupština.

## **Član 16.**

### **(Forma i sadržaj zahtjeva)**

- (1) Zahtjev iz člana 11. stav (2) ovog zakon sadrži:
  - a) naziv i sjedište podnosioca zahtjeva, odnosno ime, prezime i adresu podnosioca zahtjeva;
  - b) ime i prezime nosioca javne funkcije na kojeg se zahtjev za utvrđivanje postojanja sukoba interesa odnosi;
  - c) podatke o institucijama u kojima nosilac javne funkcije vrši javne funkcije;
  - d) činjenice iz kojih proizlazi sumnja na postojanje sukoba interesa nosioca javne funkcije;
  - e) potpis podnosioca zahtjeva, ukoliko zahtjev nije anoniman. Potpis nije potreban ni na zahtjevu koji se Komisiji podnosi elektronskim putem.
- (2) Zahtjev iz stava (1) ovog člana može da bude i anoniman.
- (3) Anonimni zahtjev mora sadržavati podatke iz stava (1) tač. b), c) i d) ovog člana.
- (4) Zahtjev iz stava (1) ovog člana podnosi se Komisiji u pisanoj formi neposredno na Protokol Kantona Sarajevo, putem pošte ili elektronskim putem, na službeni mail Komisije, koji će se uspostaviti u jedinstvenoj domeni organa uprave Kantona Sarajevo.

## **Član 17.**

### **(Dopuna i ispravka zahtjeva)**

- (1) Ako zahtjev nije sačinjen u skladu sa članom 16. ovog zakona ili je nerazumljiv ili ne sadrži dovoljno činjenica da bi se po njemu moglo postupiti, Komisija će, ukoliko ima podatke o podnosiocu, pozvati podnosioca da zahtjev dopuni, odnosno ispravi i odrediti mu rok od 15 dana za dopunu zahtjeva.
- (2) Ako podnosilac zahtjeva ne postupi na način i u roku iz stava (1) ovog člana, smatrat će se da je odustao od zahtjeva i Komisija će zahtjev odbaciti kao neuređan.
- (3) Ukoliko je podnosilac zahtjeva anoniman, Komisija nastavlja sa radom po zahtjevu u ime anonimnog podnosioca, te poduzima sve radnje kako bi se otklonili nedostaci u podnesenom zahtjevu.

## **Član 18.**

### **(Zaštita podnosioca zahtjeva)**

Komisija štiti identitet podnosioca zahtjeva i podatke o njemu ne može dostaviti nikome, izuzev nadležnom tužilaštvu, sudu ili drugim nadležnim organima radi vođenja postupka i

donošenja odluka iz njihove nadležnosti.

**Član 19.**  
**(Izjašnjenje)**

- (1) Komisija je dužna, u roku od 15 dana od dana pokretanja postupka za utvrđivanje postojanja sukoba interesa, obavijestiti nosioca javne funkcije o pokretanju postupka i zatražiti njegovo pismeno izjašnjenje na navode iz obavijesti.
- (2) Obavijest iz stava (1) ovog člana će sadržavati navode sadržane u zahtjevu iz člana 16. stav (1) ovog zakona.
- (3) Nosioc javne funkcije dužan je dostaviti Komisiji pismeno izjašnjenje iz stava (1) ovog člana, u roku od 15 dana od dana prijema obavijesti.
- (4) Ukoliko se nosilac javne funkcije ne izjasni, na način i u roku iz stava (3) ovog člana, Komisija će nastaviti postupak u skladu sa ovim zakonom.

**Član 20.**  
**(Pokretanje i vođenje postupka)**

- (1) Komisija pokreće postupak za utvrđivanja postojanja sukoba interesa nosioca javne funkcije pojedinačnim aktom, koji sadrži osnovne podatke o nosiocu javne funkcije protiv koga se pokreće i vodi postupak.
- (2) Na pokretanje i provođenje postupka za utvrđivanje postojanja sukoba interesa, koji nije uređen ovim zakonom, primijenit će se odredbe Zakona o upravnom postupku Federacije Bosne i Hercegovine.

**Član 21.**  
**(Utvrdjivanje činjenica)**

- (1) Komisija po službenoj dužnosti prikuplja isprave i dokaze kojima se utvrđuju činjenice u postupku utvrđivanja postojanja sukoba interesa nosioca javne funkcije.
- (2) Komisija ima ovlaštenje obratiti se svim institucijama, privrednim društvima i drugim pravnim licima sa zahtjevom za dostavu podataka o činjenicama o kojima vode službenu evidenciju, a koje su relevantne za provođenje postupka utvrđivanja postojanja sukoba interesa nosioca javne funkcije.
- (3) Subjekti iz stava (2) ovog člana dužni su da, u roku i na način koji odredi Komisija, dostave tražene isprave i dokaze Komisiji.
- (4) Ukoliko subjekti iz stava (2) ovog člana ne postupe u roku i na način iz stava (3) ovog člana, dužni su da o razlozima nepostupanja, u roku od sedam dana od dana prijema zahtjeva, obavijeste Komisiju.
- (5) U slučaju nepostupanja iz stava (3) ovog člana, Komisija obavještava organ koji vrši nadzor nad njihovim radom, a može podnijeti poseban izvještaj Skupštini, Vladi ili obavijestiti javnost.

**Član 22.**  
**(Odlučivanje)**

- (1) Nakon provedenog postupka utvrđivanja postojanja sukoba interesa nosioca javne funkcije, Komisija donosi odluku kojom se odlučuje o postojanju sukoba interesa.
- (2) U slučaju postojanja sukoba interesa nosioca javne funkcije zbog povrede odredbi čl. 5., 6. i 7. ovog zakona Komisija donosi odluku kojom se utvrđuje postojanje sukoba interesa nosioca javne funkcije i nosilac poziva da podnese ostavku ili na drugi način odstupi sa jedne ili više nespojivih funkcija iz čl. 5., 6. i 7. ovog zakona.
- (3) Komisija je dužna odluku iz stava (2) ovog člana dostaviti nosiocu javne funkcije, u roku od 15 dana od dana donošenja.
- (4) Odluka iz stava (2) ovog člana obavezujuća je za nosioca javne funkcije.
- (5) Odluka iz stava (2) ovog člana mora biti obrazložena.

- (6) Nositelj javne funkcije dužan je, u roku od 30 dana od dana prijema odluke iz stava (2) ovog člana, podnijeti ostavku ili na drugi način odstupiti sa jedne ili više nespojivih funkcija iz čl. 5., 6. i 7. ovog zakona i o tome pismeno obavijestiti Komisiju.
- (7) Odluku iz stava (2) ovog člana Komisija će objaviti na službenoj internet stranici Skupštine i Vlade.
- (8) Komisija će odluku iz stava (2) ovog člana dostaviti podnositelju zahtjeva iz člana 11. stav (2) ovog zakona.
- (9) Nositelj javne funkcije za kojeg se utvrdi postojanje sukoba interesa, zbog povrede odredbi čl. 5., 6. i 7. ovog zakona, ne može se kandidovati na bilo koju funkciju nosioca javne funkcije iz člana 2. stav (1) tačka c) ovog zakona, u periodu od dvije godine od prijema odluke iz stava (2) ovog člana.

### **Član 23.**

#### **(Dostavljanje odluke instituciji)**

- (1) Ukoliko nositelj javne funkcije ne podnese ostavku ili na drugi način ne odstupi sa jedne ili više nespojivih funkcija, u roku iz člana 22. stav (6) ovog zakona, Komisija dostavlja odluku iz člana 22. stav (2) ovog zakona instituciji, privrednom društvu, fondaciji ili udruženju u kojoj nositelj vrši nespojivu funkciju, sa zahtjevom za smjenu nosioca javne funkcije, njegovo razrješenje ili drugi način prestanka vršenja nespojive funkcije.
- (2) Institucija i privredno društvo dužni su smijeniti nosioca javne funkcije sa nespojive funkcije koju u njima vrši, u roku od 30 dana od dana prijema odluke iz člana 22. stav (2) ovog zakona.
- (3) Subjekti iz stava (1) ovog člana dužni su obavijestiti Komisiju o radnjama koje su poduzeli povodom odluke i zahtjeva Komisije, u roku od 30 dana od dana prijema odluke.

### **Član 24.**

#### **(Odlučivanje u slučaju ugovora o ličnim uslugama)**

- (1) U slučaju povrede člana 8. ovog zakona, Komisija donosi odluku kojom se utvrđuje postojanje sukoba interesa nosioca javne funkcije i nositelj se obavezuje da vrati naknadu koju je ostvario ugovorom o ličnim uslugama sa institucijom ili privrednim društvom iz člana 9. st. (1) i (2) ovog zakona.
- (2) Komisija će odluku iz stava (1) ovog člana dostaviti nosiocu javne funkcije, u roku od 15 dana od dana donošenja.
- (3) Odluka iz stava (1) ovog člana obavezujuća je za nosioca javne funkcije.
- (4) Odluka iz stava (1) ovog člana mora biti obrazložena.
- (5) Nositelj javne funkcije dužan je, u roku od 30 dana od dana prijema odluke iz stava (1) ovog člana, vratiti naknadu koju je ostvario ugovorom o ličnim uslugama i o tome pismeno obavijestiti Komisiju, uz dostavu dokaza o povratu naknade.
- (6) Odluku iz stava (1) ovog člana Komisija će objaviti na službenoj internet stranici Skupštine i Vlade.
- (7) Komisija će odluku iz stava (1) ovog člana dostaviti podnositelju zahtjeva iz člana 11. stav (2) ovog zakona i instituciji ili privrednom društvu iz člana 9. st. (1) i (2) ovog zakona.

### **Član 25.**

#### **(Odlučivanje u slučaju neizuzeća)**

- (1) Ako je nositelj javne funkcije povrijedio odredbe člana 9. st. (1), (2) i (3) ovog zakona, Komisija donosi odluku kojom se utvrđuje postojanje sukoba interesa nosioca javne funkcije i nositelj poziva da podnese ostavku ili na drugi način odstupi sa funkcije sa koje je glasao o pitanju koje se direktno tiče privrednog društva u kojem nositelj javne funkcije ili njegov bliski srodnik imaju finansijski interes.

- (2) Komisija će odluku iz stava (1) ovog člana dostaviti nosiocu javne funkcije, u roku od 15 dana od dana donošenja.
- (3) Nosilac javne funkcije dužan je, u roku od 30 dana od dana prijema odluke iz stava (1) ovog člana, podnijeti ostavku ili na drugi način odstupiti sa funkcije sa koje je glasao o pitanju koje se direktno tiče privrednog društva u kojem nosilac javne funkcije ili njegov bliski srodnik imaju finansijski interes i o tome pismeno obavijestiti Komisiju.
- (4) Odluku iz stava (1) ovog člana Komisija će objaviti na službenoj internet stranici Skupštine i Vlade.
- (5) Komisija će odluku iz stava (1) ovog člana dostaviti podnosiocu zahtjeva iz člana 11. stav (2) ovog zakona.
- (6) Ukoliko nosilac javne funkcije ne podnese ostavku u roku iz stava (3) ovog člana, Komisija dostavlja odluku instituciji u kojoj nosilac javne funkcije vrši javnu funkciju sa koje je glasao o pitanju koje se direktno tiče privrednog društva u kojem nosilac javne funkcije ili njegov bliski srodnik imaju finansijski interes, sa zahtjevom za smjenu nosioca javne funkcije, njegovo razrješenje ili drugi način prestanka vršenja funkcije.
- (7) Institucija je dužna smijeniti nosioca sa funkcije u roku od 30 dana od dana prijema odluke iz stava (1) ovog člana.
- (8) Institucija je dužna obavijestiti Komisiju o radnjama koje je poduzela povodom odluke, u roku od 30 dana od dana prijema odluke.

#### **Član 26.**

##### **(Konačnost odluke)**

Odluka iz člana 22. stav (2), člana 24. stav (1) i člana 25. stav (1) ovog zakona je konačna i protiv nje nosilac javne funkcije može pokrenuti upravni spor.

#### **Član 27.**

##### **(Obustava postupka)**

- (1) Ukoliko Komisija utvrdi da nosilac javne funkcije nije povrijedio odredbe čl. 5., 6., 7., 8. i 9. ovog zakona, odnosno da nije u sukobu interesa, donosi odluku o obustavi postupka protiv nosioca javne funkcije.
- (2) Komisija je dužna odluku iz stava (1) ovog člana dostaviti nosiocu javne funkcije i podnosiocu zahtjeva, u roku od 15 dana od dana donošenja odluke.

#### **Član 28.**

##### **(Davanje mišljenja)**

Komisija je nadležna za davanje mišljenja na upite predstavlja li neko stanje, postupak ili radnja nosioca javne funkcije sukob interesa.

## **DIO TREĆI – ZAŠTITA PRIJAVITELJA KORUPCIJE**

### **POGLAVLJE I – PRAVO NA PODNOŠENJE PRIJAVE**

#### **Član 29.**

##### **(Pravo prijave)**

Svako lice ima pravo da, u dobroj vjeri, prijavi bilo koji oblik korupcije u institucijama iz člana 2. stav (1) tačka d) ovog zakona, za koji sazna na bilo koji način.

#### **Član 30.**

##### **(Zaštita prijavitelja korupcije)**

- (1) Ovim dijelom zakona osigurava se zaštita prijavitelja korupcije (u daljem tekstu:

prijavitelj) koji prijavljuju korupciju u institucijama iz člana 2. stav (1) tačka d) ovog zakona.

- (2) Prijavitelj ne smije imati štetne posljedice zbog prijave korupcije učinjene u dobroj vjeri.
- (3) Prijavom korupcije učinjenom u dobroj vjeri smatra se svaka prijava koja sadrži činjenice na osnovu kojih prijavitelj sumnja da je izvršena korupcija, a koje on smatra istinitim.

### **Član 31.**

#### **(Zabrana stavljanja u nepovoljniji položaj)**

- (1) Odgovorno lice institucije ili drugi organ ne smiju stavljati prijavitelja u nepovoljniji položaj u vezi sa prijavom korupcije kojim može imati štetne posljedice.
- (2) Štetne posljedice koje može imati prijavitelj su:
  - a) mobing, uznemiravanje ili prijetnje prijaviocu od odgovornog lica ili drugih lica koja su radno angažovana kod istog poslodavca;
  - b) stvaranje loših međuljudskih odnosa u radnom okruženju ili uslova u kojima je prijavitelj u neravnopravnom položaju u odnosu na druga radno angažovana lica kod istog poslodavca, kao čin odmazde zbog prijave koju je podnio;
  - c) dovođenje prijavioca u nezakonit, nepovoljan, neravnopravan ili nepravičan položaj u vezi sa ostvarivanjem njegovih prava koja se mogu odnositi na:
    - 1) obrazovanje, i to:
      - upis u predškolske, školske i visokoškolske ustanove,
      - dodjeljivanje stipendije,
      - smještaj u đačke i studentske domove,
      - ocjenjivanje, završetak razreda, polaganje ispita, odbrana maturskih, diplomskih, master i doktorskih radova,
      - druga prava u vezi sa obrazovanjem, u skladu sa zakonom,
    - 2) zdravstvenu zaštitu, i to:
      - uključenje ili uvid u liste čekanja,
      - informacije u vezi sa zdravstvenim stanjem,
      - pregled,
      - prijem i boravak u zdravstvenoj ustanovi,
      - operativni zahvat,
      - liječenje,
      - rehabilitaciju,
      - uvid u troškove liječenja,
      - druga prava u vezi sa zdravstvenom zaštitom, u skladu sa zakonom,
    - 3) penzijsko i invalidsko osiguranje, i to:
      - starosnu penziju,
      - raspoređivanje na drugo radno mjesto,
      - prekvalifikaciju ili dokvalifikaciju,
      - novčanu naknadu u vezi sa smanjenom radnom sposobnošću,
      - invalidsku penziju,
      - porodičnu penziju,
      - druga prava u vezi sa penzijskim i invalidskim osiguranjem, u skladu sa zakonom,
    - 4) socijalnu zaštitu, i to:
      - novčanu pomoć,
      - dodatak za pomoć i njegu drugog lica,
      - smještaj u ustanovu,
      - jednokratnu novčanu pomoć,
      - druga prava u vezi sa socijalnom zaštitom, u skladu sa zakonom,

5) korišćenje usluga kantonalnih organa, javnih ustanova i ostalih pravnih subjekata prilikom ostvarivanja i zaštite njegovih prava, obaveza i interesa, i to:

- prioritarno rješavanje zahtjeva,
- pozitivno rješavanje zahtjeva,
- dobijanje bilo kojeg oblika materijalne pomoći, subvencija i podsticaja,
- nametanje ili izvršavanje obaveza,
- izdavanje dozvola, odobrenja ili saglasnosti,
- izgradnja infrastrukture (vodovod, asfaltiranje ulica, izgradnja trotoara, ulične rasvjete i dr.),

6) zapošljavanje, i to:

- učešće i uspjeh na javnim konkursima za zapošljavanje,
- drugi oblici zasnivanja radnog odnosa,
- sticanje svojstva pripravnika ili volontera,
- rad van radnog odnosa,
- osposobljavanje ili stručno usavršavanje,
- napredovanje ili ocjenjivanje na poslu,
- sticanje ili gubitak zvanja,
- disciplinske mjere i kazne,
- uslove rada,
- prestanak radnog angažovanja,
- platu i druge naknade po osnovu rada,
- isplatu jubilarne nagrade ili otpremnine,
- raspoređivanje ili premještanje na drugo radno mjesto ili mjesto rada,
- druga prava u vezi sa radom, u skladu sa zakonom,

7) javne nabavke, i to:

- učešće u postupku javne nabavke,
- izbor za najboljeg ponuđača,
- druga prava u vezi sa javnim nabavkama, u skladu sa zakonom,

8) sport, nauku ili kulturu, i to:

- organizacija takmičenja ili manifestacija,
- angažovanje sportista, naučnika ili stručnih lica, umjetnika i drugih lica u ovim oblastima,
- rezultat na takmičenjima,
- dodjeljivanje nagrada ili priznanja,
- dodjeljivanje stipendija, materijalne pomoći, subvencija ili podsticaja,
- druga prava u vezi sa sportom, naukom ili kulturom, u skladu sa zakonom;

d) svaki drugi oblik ugrožavanja ili povrede Ustavom i zakonom zagarantovanih prava, sloboda i interesa prijavioca, a koji je u uzročno-posljedičnoj vezi sa korupcijom ili prijavom korupcije ili bilo kakvo stavljanje prijavioca u nepovoljniji položaj zbog prijave korupcije.

### **Član 32.**

#### **(Zabranjena zloupotreba prijavljivanja korupcije)**

- (1) Zabranjena je zloupotreba prijavljivanja korupcije.
- (2) Zloupotreba iz stava (1) ovog člana postoji kada prijavitelj dostavlja informacije za koje, u momentu prijavljivanja, zna da nisu istinite ili se prijavom želi isključivo nanijeti šteta odgovornom licu institucije ili instituciji.

### **Član 33.**

#### **(Obavezno postupanje po prijavi)**

U slučaju prijave korupcije, odgovorno lice institucije obavezno je preduzeti sve mjere za

otkrivanje, prevenciju, suzbijanje i kažnjavanje svih oblika korupcije i mjere za zaštitu prijavitelja koji u dobroj vjeri prijavljuje korupciju.

**Član 34.**  
**(Hitnost postupka)**

Postupak u vezi sa zaštitom prijavitelja je hitan i provodi se bez odgađanja, u najkraćem roku koji je potreban da se utvrde sve činjenice koje su relevantne za donošenje pravilne odluke, u skladu sa zakonima.

**Član 35.**  
**(Odredbe drugih propisa)**

Prava i obaveze nadležnih organa uređena odredbama drugih propisa koji regulišu prevenciju, suzbijanje i kažnjavanje prekršaja, krivičnih djela i povreda radnih dužnosti ne umanjuju se odredbama ovog zakona.

## **POGLAVLJE II – PRIJAVA KORUPCIJE I POSTUPANJE PO PRIJAVI**

**Član 36.**  
**(Pojam prijave)**

Prijava korupcije je pismeno obavještenje koje sadrži podatke o korupciji iz člana 2. stav (1) tačka a) ovog zakona.

**Član 37.**  
**(Sadržaj prijave)**

- (1) Prijava sadrži:
  - a) podatke o licu za koje prijavitelj sumnja da je izvršilo korupciju (ime, prezime, pozicija radnog mjesta i dr.);
  - b) podatke o instituciji u kojoj prijavitelj sumnja da je izvršena korupcija;
  - c) navođenje činjenica i okolnosti iz kojih proizlazi sumnja prijavitelja da je izvršena korupcija.
- (2) Uz prijavu iz stava (1) ovog člana, prijavitelj dostavlja sve informacije i dokaze iz kojih proizilazi njegova sumnja da je izvršena korupcija.

**Član 38.**  
**(Vrste zaštićenog prijavljivanja)**

Vrste zaštićenog prijavljivanja su:

- a) interno prijavljivanje;
- b) eksterno prijavljivanje;
- c) javno objavljivanje informacija iz kojih proizlazi sumnja prijavitelja da je izvršena korupcija.

## **POGLAVLJE III – POSTUPAK INTERNOG I EKSTERNOG PRIJAVLJIVANJA**

**Član 39.**  
**(Pojam internog prijavljivanja)**

Interno prijavljivanje postoji kada prijavitelj podnosi prijavu odgovornom licu institucije ili ovlaštenom licu da je u instituciji izvršena korupcija.

**Član 40.**  
**(Obaveze odgovornog lica)**

- (1) Odgovorno lice institucije dužno je odrediti zaposlenika za prijem prijave korupcije.
- (2) Odgovorno lice institucije dužno je omogućiti podnošenje prijave korupcije tako što će na



vidnom na mjestu, dostupnom prijavitelju staviti kutiju/sanduče za prijave, sa jasnom naznakom: „za prijavu korupcije“.

#### **Član 41.**

##### **(Lice za postupanje po prijavama)**

Odgovorno lice institucije dužno je odrediti ovlašteno lice ili više njih za postupanje po prijavama korupcije (u daljem tekstu: ovlašteno lice).

#### **Član 42.**

##### **(Postupak sa prijavom)**

- (1) Postupak internog prijavljivanja počinje kada prijavitelj prijavu iz člana 36. ovog zakona podnese odgovornom licu institucije ili ovlaštenom licu ili prijavu podnese na način iz člana 39. ovog zakona.
- (2) Nakon prijema prijave odgovorno lice institucije ili ovlašteno lice dužno je utvrditi da li prijava ispunjava uslove propisane odredbom člana 37. stav (1) ovog zakona.
- (3) Ukoliko prijava ne ispunjava uslove propisane odredbom člana 37. stav (1) ovog zakona ovlašteno lice obavijestiti će prijavitelja, čiji mu je identitet poznat, da u roku sedam dana od dana prijema obavijesti prijavu dopuni.
- (4) Ukoliko prijavitelj ne postupi u skladu sa stavom (3) ovog člana smatrat će se da je odustao od prijave i ovlašteno lice nije dužno postupiti po navedenoj prijavi.
- (5) Ovlašteno lice dužno je postupati i po anonimnim prijavama koje sadrže sve podatke propisane odredbom člana 37. stav (1) ovog zakona.

#### **Član 43.**

##### **(Radnje nakon podnošenja prijave)**

Nakon što utvrdi da prijava korupcije sadrži sve zakonom propisane elemente odgovorno lice institucije ili ovlašteno lice dužno je:

- a) postupiti po prijavi bez odlaganja, a najkasnije u roku od 30 dana od dana prijema prijave;
- b) osigurati zaštitu ličnih podataka i anonimnost prijavitelja;
- c) poduzeti radnje u cilju otkrivanja, sprečavanja, suzbijanja i kažnjavanja korupcije, ako utvrdi da su navodi u prijavi osnovani;
- d) poduzeti mjere i aktivnosti kojima će se spriječiti ili otkloniti nastupanje štetne radnje;
- e) osigurati zaštitu i ostvarivanje prava prijavitelja;
- f) poduzeti mjere na utvrđivanju disciplinske i materijalne odgovornosti lica koje je izvršilo korupciju;
- g) obavijestiti prijavitelja o mjerama i aktivnostima poduzetim po podnesenoj prijavi, u roku od 30 dana od dana podnošenja prijave;
- h) dostaviti prijavitelju odluku o ishodu postupka po podnesenoj prijavi korupcije, u roku od osam dana od dana okončanja postupka po prijavi;
- i) prijavu, u roku pet dana od dana prijema, proslijediti organu ovlaštenom za inspekcijski nadzor, ukoliko sumnja da prijava ukazuje na izvršenje prekršaja;
- j) prijavu, u roku pet dana od dana prijema, proslijediti nadležnom tužilaštvu ili drugom organu, ukoliko prijava ukazuje na izvršenje krivičnog djela.

#### **Član 44.**

##### **(Interni provedbeni propis)**

- (1) Odgovorno lice institucije dužno je donijeti pravilnik kojim se uređuje postupak internog prijavljivanja korupcije.
- (2) Odgovorno lice institucije dužno je pravilnik iz stava (1) ovog člana učiniti dostupnim svim zaposlenicima objavom na oglasnoj tabli ili na neki drugu prikladan način.

- (3) Pravilnikom iz stava (1) ovog člana ne može se prijavitelju smanjiti obim prava ili uskratiti neko pravo propisano ovim zakonom.

#### **Član 45.**

##### **(Pojam eksternog prijavljivanja)**

- (1) Eksterno prijavljivanje postoji kada prijavitelj podnosi prijavu Ministarstvu unutrašnjih poslova Kantona Sarajevo, Kantonalnom tužilaštvu Kantona Sarajevo, Kantonalnoj upravi za inspeksijske poslove Kantona Sarajevo, Uredu ili drugim nadležnim organima o činjenicama na osnovu kojih sumnja da je u institucijama izvršena korupcija.
- (2) Rukovodilac organa iz stava (1) ovog člana dužan je donijeti pravilnik kojim se uređuje postupanje po dostavljenoj prijavi, u roku od 60 dana početka primjene ovog zakona, te isti objaviti na svojoj službenoj internet stranici.

#### **Član 46.**

##### **(Uslovi za eksterno prijavljivanje)**

Eksterno prijavljivanje vrši se u slučaju da:

- a) postupak po internom prijavljivanju iz člana 43. ovog zakona traje duže od 30 dana od dana prijema prijave ili
- b) prijavitelj smatra da je postupak po internom prijavljivanju iz člana 43. ovog zakona bio nepravilan ili
- c) prijavitelj ima razloga da vjeruje da se odgovorno ili ovlašteno lice može direktno ili indirektno dovesti u vezu sa korupcijom.

#### **Član 47.**

##### **(Obaveze organa po prijavi)**

- (1) Organ iz člana 45. ovog zakona kojem je dostavljena prijava, ukoliko posebnim zakonom nije propisano drugačije, dužan je u roku od 15 dana od dana prijema prijave postupiti po dostavljenoj prijavi.
- (2) Ukoliko organ iz stava (1) ovog člana nije nadležan za postupanje po dostavljenoj prijavi dužan je u roku od osam dana od dana prijema prijavu dostaviti nadležnom organu i o istom obavijestiti prijavitelja.

#### **Član 48.**

##### **(Teret dokazivanja)**

- (1) U svim postupcima prijave korupcije predviđene ovim zakonom kada lice ili grupa lica, na osnovu njima raspoloživih dokaza, učine vjerovatnim da je došlo do korupcije, teret dokazivanja da nije došlo do korupcije leži na suprotnoj strani.
- (2) U slučajevima kada lice smatra da je snosilo posljedice korupcije zbog propuštanja sprečavanja korupcije, teret dokazivanja leži na protivnoj strani.
- (3) Odredba stava (1) ovog člana ne primjenjuje se u prekršajnim i krivičnim postupcima.

#### **Član 49.**

##### **(Postupanje Ureda po prijavi)**

- (1) Ukoliko prijavitelj podnese prijavu Uredu, a Ured utvrdi da prijava sadrži podatke o korupciji iz člana 2. stav (1) tačka a) ovog zakona, Ured će prijavu, u roku od 15 dana od dana prijema, proslijediti nadležnom organu na postupanje.
- (2) Ovakav način postupanja Ureda primjenjuje se samo kad je riječ o prijavama koje ukazuju na korupciju iz člana 2. stav (1) tačka a) ovog zakona.
- (3) U slučaju prijave iz stava (1) ovog člana, Ured će ponuditi savjetodavnu, stručnu pravnu pomoć prijavitelju u ostvarivanju i zaštiti njegovih prava propisanih ovim dijelom zakona.

- (4) Ured je dužan da osigura zaštitu ličnih podataka i anonimnost prijavitelja.

#### **Član 50.**

##### **(Poseban oblik zaštićenog prijavljivanja)**

- (1) Zaštićenim prijavljivanjem, u smislu člana 38. stav (1) tačka c) ovog zakona, smatra se i objavljivanje putem sredstava javnog informisanja, ili na drugi način činjenje javno dostupnim, informacija koje ukazuju da je izvršena ili da je u toku korupcija.
- (2) Zaštićeno prijavljivanje u smislu stava (1) ovog člana postoji ako prijavitelj, na osnovu dobre vjere i opravdane sumnje, smatra:
  - a) da će nastupiti štetne radnje ili druge štetne posljedice;
  - b) da ukoliko izvrši interno ili eksterno prijavljivanje neće biti poduzeta adekvatna reakcija, ili da će dokazi i informacije biti prikriveni ili uništeni ili
  - c) ako prema saznanjima prijavitelja, na osnovu internog ili eksternog prijavljivanja, u razumnom roku nije poduzeta adekvatna reakcija.
- (3) Prijavljivanje iz stava (1) ovog člana se ne može izvršiti u slučaju da prijava sadrži tajne podatke u smislu odredbi Zakona o zaštiti tajnih podataka („Službeni glasnik BiH“, br. 54/05 i 12/09)

### **POGLAVLJE IV – ZAŠTITA PRIJAVITELJA**

#### **Član 51.**

##### **(Interna zaštita)**

- (1) Postupak interne zaštite pokreće prijavitelj koji trpi štetnu radnju iz člana 2. stav (1) tačka u) ovog zakona, podnošenjem zahtjeva odgovornom licu institucije.
- (2) Zahtjev iz stava (1) ovog člana podnosi se u roku od 30 dana od dana saznanja za štetnu radnju, a najkasnije u roku od godinu dana od dana nastanka štetne radnje.
- (3) Odgovorno lice institucije dužno je odlučiti o zahtjevu u roku od 30 dana od dana podnošenja zahtjeva.
- (4) U slučaju da odgovorno lice institucije utvrdi osnovanost zahtjeva iz stava (1) ovog člana dužno je bez odlaganja poduzeti mjere i aktivnosti kojima će se otkloniti akt činjenja ili nečinjenja koji je utvrđen kao štetna radnja.

#### **Član 52.**

##### **(Eksterna zaštita)**

- (1) Postupak eksterne zaštite pokreće prijavitelj koji trpi štetnu radnju iz člana 2. stav (1) tačka u) ovog zakona, podnošenjem tužbe nadležnom sudu.
- (2) Tužba iz stava (1) ovog člana podnosi se u roku od 30 dana od dana saznanja za štetnu radnju, a najkasnije u roku od godinu dana od dana nastanka štetne radnje.
- (3) Ukoliko prijavitelj nije zadovoljan odlukom iz člana 51. stav (3) ovog zakona, a koju je donijelo odgovorno lice institucije u postupku interne zaštite ili ukoliko odgovorno lice institucije ne donese odluku u roku od 30 dana od dana podnošenja zahtjeva iz člana 48. stav (1) ovog zakona, prijavitelj može tražiti sudsku zaštitu.
- (4) Prijavitelj može zahtijevati eksternu zaštitu i kada nije prethodno tražio internu zaštitu.

#### **Član 53.**

##### **(Mjesna nadležnost)**

U postupku sudske zaštite prava prijavitelja i prava drugih lica koja trpe štetnu radnju mjesno je nadležan općinski sud prema mjestu nastanka štetne radnje ili prema mjestu prebivališta, odnosno boravišta tužitelja.

#### **Član 54.**

##### **(Shodna primjena propisa)**

Na pitanja postupka sudske zaštite koja nisu regulirana ovim zakonom, shodno se primjenjuju odredbe Zakona o parničnom postupku („Službene novine Federacije Bosne i Hercegovine“, br. 53/03, 73/05, 19/06 i 98/15).

### **DIO ČETVRTI – PREVENCIJA KORUPCIJE**

#### **POGLAVLJE I – JAČANJE INTEGRITETA**

#### **Član 55.**

##### **(Pojam integriteta)**

Integritet predstavlja zakonito, nezavisno, nepristrasno, učinkovito, odgovorno i transparentno vršenje poslova kojim nosioci javnih funkcija, odgovorna lica i zaposleni u institucijama iz člana 2. stav (1) tačka d) ovog zakona čuvaju svoj ugled i ugled institucije, obezbjeđuju povjerenje građana u vršenje javnih funkcija i rad institucije, te otklanjaju sumnju u mogućnost nastanka i razvoja korupcije.

#### **Član 56.**

##### **(Plan integriteta)**

- (1) Plan integriteta je interni dokument institucije koji sadrži detaljnu procjenu podložnosti određenih radnih mjesta, radnih procesa i poslova nastanku i razvoju korupcije i drugih oblika pristrasnog postupanja, skup konkretnih mjera kojima se preveniraju i otklanjaju mogućnosti za nastanak i razvoj korupcije i obezbjeđuje povjerenje građana u rad institucije.
- (2) Sve institucije iz člana 2. stav (1) tačka d) ovog zakona dužne su, u roku od 90 dana od stupanja na snagu ovog zakona, donijeti vlastite planove integriteta.
- (3) Institucije su dužne plan integriteta dostaviti Uredu, u roku od 15 dana od dana donošenja.
- (4) Plan integriteta može donijeti i privredno društvo iz člana 2. stav (1) tačka o) ovog zakona.
- (5) Plan integriteta donosi se u skladu sa Uputstvom za izradu i provođenje plana integriteta, koje na prijedlog Ureda donosi Vlada.

#### **Član 57.**

##### **(Sadržaj plana integriteta)**

Plan integriteta sadrži:

- a) detaljnu procjenu podložnosti institucije korupciji i drugim oblicima narušavanja integriteta;
- b) opis radnih mjesta, radnih procesa i poslova koji su naročito podložni korupciji i drugim oblicima narušavanja integriteta;
- c) vrste rizika od korupcije i drugih oblika narušavanja integriteta za radna mjesta, radne procesa i poslove iz tačke b) ovog člana;
- d) preventivne mjere za smanjenje rizika od korupcije i drugih oblika narušavanja integriteta za radna mjesta, radne procesa i poslove iz tačke b) ovog člana;
- e) rokove za sprovođenje preventivnih mjera;
- f) podatke o licu odgovornom za izradu i provođenje plana integriteta u instituciji (u daljem tekstu: menadžer integriteta);
- g) druge podatke propisane Uputstvom za izradu i provođenje plana integriteta.

#### **Član 58.**

### **(Procjena planova integriteta)**

Ured vrši procjenu usaglašenosti dostavljenih planova integriteta institucija sa ovim zakonom i Uputstvom za izradu i provođenje plana integriteta, te donosi preporuke za unaprjeđenje planova integriteta institucija.

### **Član 59.**

#### **(Menadžer integriteta)**

- (1) Menadžera integriteta rješenjem određuje odgovorno lice institucije.
- (2) Odgovorno lice institucije i zaposleni u instituciji dužni su da menadžeru integriteta, na njegov zahtjev, dostave potrebne podatke i informacije od značaja za izradu i provođenje plana integriteta.

## **POGLAVLJE II – IZVJEŠTAVANJE**

### **Član 60.**

#### **(Dostupnost plana)**

Institucija je dužna plan integriteta učiniti dostupnim javnosti objavljivanjem na svojoj internet stranici.

### **Član 61.**

#### **(Učinkovitost plana integriteta)**

- (1) Plan integriteta može se mijenjati u zavisnosti od potreba institucije, izmjene radnih mjesta, radnih procesa i poslova, razvoja, prelaska na nove metode rada i drugih promjena koje značajnije utiču na obavljanje djelatnosti institucije.
- (2) Institucija svake druge godine procjenjuje učinkovitost plana integriteta, u skladu sa Uputstvom za izradu i provođenje plana integriteta.

### **Član 62.**

#### **(Izveštaj o provođenju plana integriteta)**

- (1) Institucija je dužna dostaviti Uredu izvještaj o provođenju plana integriteta.
- (2) Izvještaj iz stava (1) ovog člana institucija dostavlja Uredu do 31. marta tekuće godine, za prethodnu godinu.
- (3) Na osnovu dostavljenih planova integriteta, izvještaja o provođenju planova integriteta i preporuka za unaprjeđenje planova integriteta Ured sačinjava izvještaj o donošenju i provođenju planova integriteta u institucijama.

### **Član 63.**

#### **(Sadržaj izvještaja)**

Izveštaj o provođenju plana integriteta institucije sadrži:

- a) podatke o tome koje su mjere iz plana integriteta provedene;
- b) navođenje mjera koje nisu provedene;
- c) razloge zbog kojih mjere nisu sprovedene.

### **Član 64.**

#### **(Odgovornost za donošenje plana integriteta)**

Za donošenje, provođenje i izvještavanje o provođenju plana integriteta odgovorno je odgovorno lice institucije iz člana 2. stav (1) tačka d) ovog zakona.

## **DIO PETI – NADZOR NAD PRIMJENOM I KAZNE NE ODREDBE**

## **Član 65.**

### **(Nadzor nad primjenom i provođenjem ovog zakona)**

- (1) Pružanje savjetodavnih mišljenja u vezi pravilne primjene ovog zakona vrši Ured.
- (2) Nadzor nad primjenom ovog zakona vrši Ministarstvo pravde i uprave Kantona Sarajevo.

## **Član 66.**

### **(Prekršaji i prekršajne kazne za instituciju, odgovorno lice institucije i ovlašteno lice)**

- (1) Novčanom kaznom u iznosu od 3.000,00 KM do 20.000,00 KM kaznit će se za prekršaj institucija, ako:
  - a) ne unese u zapisnik izjavu nosioca javne funkcije o postojanju finansijskog interesa, njega ili njegovog bliskog srodnika, u privrednom društvu (član 9. stav (4) ovog zakon);
  - b) ne dostavi Komisiji, u roku i na način koji odredi Komisija, tražene isprave i dokaze, odnosno o razlozima nepostupanja po zahtjevu Komisije za dostavu podataka ne obavijesti Ured (član 21. st. (3) i (4) ovog zakona);
  - c) ne smijeni nosioca javne funkcije sa nespojive funkcije koju u njoj vrši, u roku od 30 dana od dana prijema odluke kojom se utvrđuje postojanje sukoba interesa nosioca javne funkcije i nosilac poziva da podnese ostavku ili na drugi način odstupa sa nespojive funkcije (član 23. stav (2) ovog zakona);
  - d) ne obavijesti Komisiju o radnjama koje je poduzela povodom dostavljene odluke kojom se utvrđuje postojanje sukoba interesa nosioca javne funkcije i nosilac poziva da podnese ostavku ili na drugi način odstupa sa nespojive funkcije i zahtjeva za smjenu nosioca javne funkcije, njegovo razrješenje ili drugi način prestanka vršenja nespojive funkcije, u roku od 30 dana od dana prijema odluke (član 23. stav (3) ovog zakona);
  - e) ne smijeni nosioca javne funkcije sa funkcije, u roku od 30 dana od dana prijema odluke iz člana 25. stava (1) ovog zakona (član 25. stav (7) ovog zakona);
  - f) ne obavijesti Komisiju o radnjama koje je poduzela povodom dostavljene odluke iz člana 25. stava (1) ovog zakona, u roku od 30 dana od dana prijema ove odluke (član 25. stav (8) ovog zakona);
  - g) stavi prijavitelja u nepovoljniji položaj u vezi sa prijavom korupcije (član 31. ovog zakona);
  - h) ne preduzme sve mjere za otkrivanje, prevenciju, suzbijanje i kažnjavanje svih oblika korupcije i mjere za zaštitu prijavitelja koji u dobroj vjeri prijavljuje korupciju (član 33. ovog zakona);
  - i) ne odredi zaposlenika za prijem prijave korupcije, odnosno ne omogući podnošenje prijave korupcije tako što će na vidnom na mjestu, dostupnom prijavitelju, staviti kutiju/sanduče za prijave, sa jasnom naznakom: „za prijavu korupcije“ (član 40. ovog zakona);
  - j) ne odredi ovlašteno lice za postupanje po prijavama korupcije (član 41 ovog zakona);
  - k) ne preduzme sve radnje nakon podnošenja prijave korupcije koja sadrži sve zakonom propisane elemente (član 43. ovog zakona);
  - l) ne donese i objavi pravilnik kojim se uređuje postupak internog prijavljivanja korupcije (član 44. ovog zakona);
  - m) ne donese, u roku od 90 dana od stupanja na snagu ovog zakona, vlastiti plan integriteta usaglašen sa ovim zakonom i Uputstvom za izradu i provođenje plana integriteta i isti ne dostavi Uredu, u roku od 15 dana od dana donošenja (član 56. st. (2) i (3) ovog zakona);
  - n) ne objavi plan integriteta na svojoj internet stranici (član 60. ovog zakona);
  - r) ne dostavi Uredu izvještaj o provođenju plana integriteta, do 31. marta tekuće godine

za prethodnu godinu (član 62. st. (1) i (2) ovog zakona).

- (2) Za prekršaje iz stava (1) ovog člana kaznit će se i odgovorno lice institucije, novčanom kaznom u iznosu od 2.000,00 KM do 10.000,00 KM.
- (3) Novčanom kaznom uz iznosu od 500,00 KM do 3.000,00 KM kaznit će se za prekršaj ovlašteno lice, ako:
  - a) nakon prijema prijave korupcije ne utvrdi da li prijava ispunjava uslove propisane ovim zakonom (član 42. stav (2) ovog zakona);
  - b) ne obavijesti prijavitelja čiji mu je identitet poznat da prijava ne ispunjava uslove propisane ovim zakonom (član 42. stav (3) ovog zakona);
  - c) ne preduzme sve radnje nakon podnošenja prijave korupcije koja sadrži sve zakonom propisane elemente (član 43. ovog zakona).

### **Član 67.**

#### **(Prekršaji i prekršajne kazne za privredno društvo i odgovorno lice privrednog društva)**

- (1) Novčanom kaznom u iznosu od 3.000,00 KM do 20.000,00 KM kaznit će se za prekršaj privredno društvo, ako:
  - a) ne poništi ugovor o pružanju ličnih usluga sa nosiocem javne funkcije (član 8. stav (3) ovog zakona);
  - b) ne dostavi Komisiji, u roku i na način koji odredi Komisija, tražene isprave i dokaze, odnosno o razlozima nepostupanja po zahtjevu Komisije za dostavu podataka ne obavijesti Ured (član 21. st. (3) i (4) ovog zakona);
  - c) ne smijeni nosioca javne funkcije sa nespojive funkcije koju u privrednom društvu vrši, u roku od 30 dana od dana prijema odluke kojom se utvrđuje postojanje sukoba interesa nosioca javne funkcije i nosilac poziva da podnese ostavku ili na drugi način odstupa sa nespojive funkcije (član 23. stav (2) ovog zakona);
  - d) ne obavijesti Komisiju o radnjama koje je privredno društvo poduzelo povodom dostavljene odluke kojom se utvrđuje postojanje sukoba interesa nosioca javne funkcije i nosilac poziva da podnese ostavku ili na drugi način odstupa sa nespojive funkcije i zahtjeva za smjenu nosioca javne funkcije, njegovo razrješenje ili drugi način prestanka vršenja nespojive funkcije, u roku od 30 dana od dana prijema odluke (član 23. stav (3) ovog zakona).
- (2) Za prekršaje iz stava (1) ovog člana kaznit će se i odgovorno lice privrednog društva, novčanom kaznom u iznosu od 2.000,00 KM do 10.000,00 KM.

### **Član 68.**

#### **(Prekršaji i prekršajne kazne za nosioca javne funkcije)**

Novčanom kaznom u iznosu od 2.000,00 KM do 10.000,00 KM kaznit će se za prekršaj nosilac javne funkcije, ako:

- a) ne podnese ostavku ili na drugi način ne odstupa sa nespojive funkcije iz člana 5. st. (1), i (3) ovog zakona, u roku od 30 dana nakon preuzimanja zadnje nespojive funkcije (član 5. stav (5) ovog zakona);
- b) ne podnese ostavku ili na drugi način ne odstupa sa nespojive funkcije iz člana 6. st. (1) i (2) ovog zakona, u roku od 30 dana nakon preuzimanja zadnje nespojive funkcije (član 6. stav (3) ovog zakona);
- c) ne podnese ostavku ili na drugi način ne odstupa sa dužnosti odgovornog lica u udruženjima i fondacijama koje se finansiraju iz budžeta Kantona Sarajevo u iznosu većem od 10.000,00 KM godišnje, odnosno o iznosu većem od 50.000,00 KM godišnje u udruženjima i fondacijama iz oblasti kulture i sporta, u roku od 30 dana nakon preuzimanja zadnje nespojive funkcije (član 7. stav (2) ovog zakona);

- d) za vrijeme vršenja javne funkcije sklopi ugovore o pružanju ličnih usluga sa institucijama ili privrednim društvom koje sklapa ugovore ili na drugi način posluje sa institucijama, ako je vrijednost tog pravnog posla veća od 10.000,00 KM na godišnjem nivou (član 8. st. (1) i (2) ovog zakona);
- e) glasa po bilo kojem pitanju koje se direktno tiče privrednog društva u kojem on ili njegov bliski srodnik imaju finansijski interes ili preduzme službene radnje koje bi mogle direktno uticati na privredno društvo u kojem on ili njegov bliski srodnik imaju finansijski interes (član 9. st. (1) i (2) ovog zakona);
- f) ne da izjavu o postojanju finansijskog interesa njega ili njegovog bliskog srodnika u privrednom društvu, te time ne obavijesti ostale učesnike u raspravi i odlučivanju, prije svog učešća u raspravi, a najkasnije prije početka odlučivanja, po bilo kojem pitanju koje se direktno tiče tog privrednog društva (član 9. stav (3) ovog zakona);
- g) poduzme jednu ili više ovim zakonom, nosiocu javne funkcije, zabranjenih aktivnosti (član 10. ovog zakona);
- h) ne podnese ostavku ili na drugi način ne odstupiti sa jedne ili više nespojivih funkcija iz čl. 5., 6. i 7. ovog zakona i o tome pismeno ne obavijesti Komisiju, u roku od 30 dana od dana prijema odluke kojom se utvrđuje postojanje sukoba interesa nosioca javne funkcije i nosilac poziva da podnese ostavku ili na drugi način odstupi sa jedne ili više nespojivih funkcija iz čl. 5., 6. i 7. ovog zakona (član 22. stav (6) ovog zakona);
- i) ne vrati naknadu koju je ostvario ugovorom o ličnim uslugama i o tome pismeno obavijesti Ured, u roku od 30 dana od dana prijema odluke kojom se utvrđuje postojanje sukoba interesa nosioca javne funkcije i nosilac obavezuje da vrati naknadu koju je ostvario ugovorom o ličnim uslugama (član 24. stav (5) ovog zakona);
- j) ne podnese ostavku ili na drugi način ne odstupiti sa funkcije sa koje je glasao o pitanju koje se direktno tiče privrednog društva u kojem on ili njegov bliski srodnik imaju finansijski interes, u roku od 30 dana od dana prijema odluke kojom se utvrđuje postojanje sukoba interesa nosioca javne funkcije i nosilac poziva da podnese ostavku ili na drugi način odstupi sa funkcije sa koje je glasao o pitanju koje se direktno tiče privrednog društva u kojem on ili njegov bliski srodnik imaju finansijski interes (član 25. stav (3) ovog zakona).

## **DIO ŠESTI – PRIJELAZNE I ZAVRŠNE ODREDBE**

### **Član 69.**

#### **(Propisi koje donosi Vlada)**

U roku od 30 dana od dana stupanja na snagu ovog zakona Vlada će, na prijedlog Ureda, donijeti slijedeće propise:

- a) Uputstvo za izradu i provođenje plana integriteta (član 56. stav (5) ovog zakona);
- b) Metodologiju za procjenu rizika od korupcije u propisima.

### **Član 70.**

#### **(Propis koji donosi Ured)**

U roku od 30 od dana od stupanja na snagu ovog zakona, Ured će donijeti Instrukciju o postupanju po zaprimljenim prijavama korupcije.

### **Član 71.**

#### **(Rok za ostavku nosioca javnih funkcija)**



Nosioci javnih funkcija koji se u trenutku stupanja na snagu ovog zakona nalaze na nekoj od nespojivih funkcija iz čl. 5., 7. i 8. ovog zakona dužni su, u roku 30 od dana stupanja na snagu ovog zakona, podnijeti ostavku ili na drugi način odstupiti sa nespojive funkcije.

**Član 72.**  
**(Važenje zakona)**

U slučaju da viši nivoi vlasti donesu ili promijene zakon koji se odnosi na materiju regulisanu ovim zakonom, odredbe ovog zakona će se uskladiti sa tim zakonom.

**Član 73.**  
**(Stupanje na snagu)**

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj:

**PREDSJEDAVAJUĆI SKUPŠTINE  
KANTONA SARAJEVO**

Datum:

**Elvedin Okerić**

## O B R A Z L O Ž E N J E

### I – PRAVNI OSNOV

Pravni osnov za donošenje ovog zakona sadržan je u odredbama člana 18. tačka b) Ustava Kantona Sarajevo ("Službene novine Kantona Sarajevo" br.1/96, 2/96 - Ispravka 3/96 - Ispravka, 16/97, 14/00, 4/01, 28/04, 6/13 i 31/17) kojim je propisano da Skupština Kantona Sarajevo donosi zakone i druge propise u okviru izvršavanja nadležnosti Kantona, izuzev propisa koji su ovim Ustavom ili zakonom dati u nadležnost Vlade Kantona.

### II – RAZLOZI DONOŠENJA

Ovaj nacrt zakona je nastavak aktivnosti na antikoruptivnom opredjeljenju Vlade i Skupštine Kantona Sarajevo s ciljem jačanja povjerenja građana u institucije, te uvođenje institucionalne zaštite prijavitelja korupcije u institucijama Kantona Sarajevo.

Naime, imajući vidu opredjeljenost Vlade i Skupštine Kantona Sarajevo ka institucionalnom jačanju aktivnosti na prevenciji sprječavanju borbe protiv korupcije u Kantonu Sarajevo, predlaže se donošenje ovog zakona. Kao što je i ranije navedeno u nekim od propisa, kao jedan od razloga za donošenje ovog zakona je i obaveza proizašla iz međunarodnih konvencija koje je Bosna i Hercegovina ratificirala, a to je Konvencija o borbi protiv korupcije ("Službeni glasnik BiH"-Međunarodnih ugovori, broj 5/06), koja propisuje u članu 6.:

*"(1) Svaka država stranka će, u skladu s osnovnim načelima svog pravnog sistema, uspostaviti, prema potrebi, tijelo ili tijela za sprječavanje korupcije sredstvima kao što su:*

*a) provođenje politike pomenute u članu 5. ove Konvencije i, gdje to odgovara, nadgledanje i koordiniranje provođenja te politike;*

*b) unapređenje i širenje znanja o sprječavanju korupcije.*

*(2) Svaka država stranka će osigurati tijelu ili tijelima pomenutim u tački 1. ovog člana potrebnu nezavisnost, u skladu sa osnovnim načelima svog pravnog sistema, kako bi to tijelo ili tijela mogla vršiti svoje funkcije uspješno i neometano od bilo kakvog neopravdanog uticaja. Treba osigurati neophodna materijalna sredstva i specijalizirano osoblje, kao i obuku tog osoblja za obavljanje funkcija."*

S obzirom na opredjeljenje Vlade Kantona Sarajevo na transparentan rad i borbu protiv korupcije, ovaj zakon je jedan od ključnih koraka u pravcu transparentnosti. Naime, predmetnim zakonom se utvrđuju obaveze nosiocima javnih funkcija u vršenju javnih funkcija, pravila o prevenciji, utvrđivanju i odlučivanju o sukobu interesa u vršenju javnih funkcija, zaštita lica koja prijavljuju korupciju, jačanje integriteta institucija i njihovih zaposlenika, ograničenja i odgovornosti u vršenju javnih funkcija, kao i druga pitanja od značaja za prevenciju, suzbijanje i borbu protiv korupcije u Kantonu Sarajevo.

Pored obaveza iz stava (1) ovog člana, ovim zakonom osigurava se zabrana vršenja nespojivih javnih funkcija, prevencija sukoba interesa i koruptivnog djelovanja u vršenju javne funkcije, zaštita integriteta javne funkcije, zaštita lica koja u dobroj vjeri prijavljuju korupciju u institucijama i jačanje organa koji imaju nadležnosti u oblasti prevencije, suzbijanja i borbe protiv korupcije u Kantonu Sarajevo, te se propisuje obaveza odgovornog ponašanja u vršenju javnih funkcija i drugih odgovornih dužnosti u Kantonu Sarajevo.

### III – PRAVNA RJEŠENJA

Ovaj zakon se sastoji iz šest dijelova kako slijedi:

**DIO PRVI** – Ovim dijelom se reguliše predmet zakona, te daju defincije termina korištenih u ovom zakonu kao i gramatička terminologija da se termini korišteni u ovom zakonu odnose na oba spola.

**DIO DRUGI** – Ovim dijelom se reguliše pitanje sukoba interesa, propisuju se principi djelovanja u vršenju javne funkcije, nespojivosti i ograničenja u vršenju javnih funkcija, propisuju se zabranjene aktivnosti, način odlučivanja o sukobu interesa, koji su organi nadležni za odlučivanje, postupak podnošenja zahtjeva za utvrđivanje postojanja sukoba interesa, odlučivanje, konačnost odluka, kao i propisivanje nadležnosti Komisiji za utvrđivanje sukoba interesa o davanju mišljenja da li određeno stanje, postupak ili radnja nosioca javne funkcije predstavlja sukob interesa.

**DIO TREĆI** – Ovim dijelom zakona reguliše se zaštita prijavitelja korupcije, propisuje se ko ima pravo prijave korupcije, njihova zaštita, propisuje se zabrana stavljanja u nepovoljniji položaj, postupanje po prijavama za postojanje korupcije, postupci internog i eksternog prijavljivanja, kao i zaštita prijavitelja korupcije (interna i eksterna zaštita).

**DIO ČETVRTI** – U ovom dijelu obrađeno je pitanje jačanje integriteta institucija u javnom sektoru na teritoriji Kantona Sarajevo, utvrđuje se pojam integriteta, plan integriteta, obavezan sadržaj plana integriteta, imenovanje menadžera integriteta, propisuje se izvještavanje o integritetu koja se odnosi na dostupnost planova, njihova učinkovitost, kao i sadržaj izvještaja.

**DIO PETI** – U ovom dijelu je propisan nadzor na primjenom i provođenjem ovog zakona koji vrši Ured za borbu protiv korupcije i upravljanje kvalitetom, te prekršajne odredbe za kršenje odredbi ovog zakona.

**DIO ŠESTI** – Ovim dijelom propisuju prijelazne i završne odredbe zakona i stupanje na snagu ovog zakona.

#### **IV – FINANSIJSKA SREDSTVA**

Za provođenje ovog zakona potrebno je obezbjediti dodatna finansijska sredstva na poziciji Službe za skupštinske poslove, za naknadu članovima Komisije za utvrđivanje sukoba interesa. Proicirani troškovi u Budžetu Kantona Sarajevo za 2022. godine iznose 7.200,00 KM, dok je za naredne godine potrebno planirati sredstva u iznosu do 28.800,00 KM (naknada za rad članova Komisije za utvrđivanje sukoba interesa).



Bosnia and Herzegovina  
Federation of Bosnia and Herzegovina

**CANTON SARAJEVO**  
Ministry of Finance

Broj: 08-03-11-4952/22 NK  
Sarajevo, 21.02.2022. godine

**MINISTARSTVO PRAVDE I UPRAVE**  
**KANTONA SARAJEVO**

**Predmet:** Mišljenje na Nacrt zakona o prevenciji i suzbijanju korupcije u Kantonu Sarajevo

**Veza:** Vaš dopis, broj: 03-04-02-4850/22 od 18.02.2022. godine

Vežano za Vaš zahtjev za mišljenje na Nacrt zakona o prevenciji i suzbijanju korupcije u Kantonu Sarajevo, u skladu sa članom 8. Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, broj 34/16 i 15/18), dajemo sljedeće mišljenje:

Ministarstvo pravde i uprave je postupilo u skladu sa navedenim Pravilnikom i Ministarstvu finansija uz Nacrt zakona dostavilo na mišljenje popunjen i potpisan obrazac IFP-DA uz koji je dostavljeno obrazloženje koje glasi:

„Članom 12. Nacrta zakona o prevenciji i suzbijanju korupcije U Kantonu Sarajevo propisano je imenovanje Komisije za utvrđivanje sukoba interesa, koju čine predsjednik i četiri člana. U stavu 17. člana 12. propisano je da članovi Komisije za svoj rad imaju pravo na mjesečnu naknadu čiju visinu utvrđuje nadležna komisija Skupštine KS. Usvajanje ovog zakona očekuje se sredinom 2022. godine, nakon čega će se pristupiti imenovanju članova komisije od strane Skupštine KS, a na prijedlog Komisije za izbor i imenovanja Skupštine KS. S obzirom da će Komisija za utvrđivanje sukoba interesa biti imenovana u posljednjem kvartalu 2022. godine, te da predlažemo da naknada po članu komisije ne bude veća od 800 KM, ovo ministarstvo je radilo procjenu za naknade u visini od 600. KM po članu. Slijedom navedenog, ukupni rashodi za naknadu četiri člana Komisije za utvrđivanje sukoba interesa, za tri mjeseca 2022. godine iznose 7.200 KM. Za 12 mjeseci 2023. godine ukupni rashodi za naknade članova Komisije za utvrđivanje sukoba interesa iznose 28.800 KM. Ukupni rashodi za naknade članova Komisije u 2024. godini iznose 28.800 KM“

U obrascu izjave o fiskalnoj procjeni IFP-DA vidljivo je da će za implementaciju Zakona o prevenciji i suzbijanju korupcije u Kantonu Sarajevo biti potrebna dodatna sredstva u iznosu 7.200 KM u 2022. godini i 28.800 KM u 2023. i 2024. godini.

Obzirom da Zakon o prevenciji i suzbijanju korupcije u Kantonu Sarajevo ima fiskalni efekat na Budžet Kantona Sarajevo za 2022. godinu i da će imati dodatne finansijske efekte na budžetsku 2023. i 2024. godinu, Ministarstvo finansija sa aspekta fiskalnog učinka na budžet konstatuje da u Budžetu Kantona Sarajevo za 2022. godinu nisu planirana sredstva u iznosu od 7.200 KM, te je potrebno da Predlagač zakona obezbijedi sredstva putem preraspodjele sredstava u skladu sa Zakonom o izvršavanju Budžeta Kantona Sarajevo za 2022. godinu. Takođe, potrebno je da Predlagač zakona obezbijedi sredstva u iznosu od 28.800 KM za 2023. i 2024. godinu u skladu sa odobrenom gornjom granicom rashoda (limita) i fiskalnim kapacitetom Kantona Sarajevo.

Ovo mišljenje je dato u skladu sa odredbama Nacrta zakona koji se obrađuje, podataka navedenih u Obrascu IFP-DA Izjave o fiskalnoj procjeni i obrazloženja dostavljenog uz Obrazac, čija tačnost je u isključivoj odgovornosti Predlagača, te ukoliko se naknadno utvrdi da navedene odredbe i podaci odstupaju od stvarno činjeničnog stanja, ovo mišljenje će se staviti van snage.




Dostaviti:

- 1) Naslovu
2. MF – Sektor za budžet i fiskalni sistem
3. a/a

Pripremila: Nihad Kurtić

Kontrolisala: Amina Močević, mr. oec.



Broj: 09-02-4953/22  
Sarajevo, 21.02.2022. godine

KANTON SARAJEVO  
MINISTARSTVO PRAVDE I UPRAVE

**PREDMET: Stručno mišljenje na nacrt Zakona o prevenciji i suzbijanju  
korupcije u Kantonu Sarajevo.-**

Na osnovu člana 2. Uredbe o Uredu za zakonodavstvo Vlade Kantona Sarajevo ("Službene novine Kantona Sarajevo", broj: 7/06-Prečišćeni tekst) i člana 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17- Drugi novi prečišćeni tekst i 2/18- Ispravka), Ured za zakonodavstvo Vlade Kantona Sarajevo, daje slijedeće

**MIŠLJENJE**

1. Ured za zakonodavstvo Vlade Kantona Sarajevo (u daljem tekstu:Ured) nema primjedbi na dostavljeni tekst nacrta Zakona o prevenciji i suzbijanju korupcije u Kantonu Sarajevo (u daljem tekstu:Zakon), po pitanju njegove usklađenosti sa odredbama ustava i drugih pozitivno-pravnih propisa, a iz razloga koji su navedeni u obrazloženju predmetnog materijala.

Ured je mišljenja da sve aktivnosti koje vode ka sprječavanju nezakonitih radnji i postupaka su obaveza svih nivoa vlasti, pa tako i Kantona Sarajevo.


Osnovni cilj donošenja predmetnog Zakona je da se u što većem obimu uspostavi vladavina prava, kao i zakonito postupanje u procesima koji su predmetom nacrta Zakona.

S tim u vezi, nacrt Zakona može poslužiti kao polazna osnova za pripremu što kvalitetnijeg prijedloga ovog propisa.

2. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17- Drugi novi prečišćeni tekst i 2/18- Ispravka), te se isti može razmatrati na jednoj od narednih sjednica Vlade Kantona Sarajevo.

Dostaviti:

1. Naslovu
2. Evidencija
3. Arhiva



## **PRILOZI**

### **USTAV KANTONA SARAJEVO**

**(“Službene novine Kantona Sarajevo”, br. 1/96, 2/96-Ispravka, 3/96-Ispravka, 16/97,  
14/00, 4/01, 28/04, 6/13 i 31/17)**

#### **Član 18. b).**

Skupština Kantona:

b) donosi zakone i druge propise u okviru izvršavanja nadležnosti Kantona, izuzev propisa koji su ovim Ustavom ili zakonom dati u nadležnost Vlade Kantona;